

河東鄭氏世蹟實錄重刊序

古則重乎道德文章忠孝勳業邦省鄉隣依其典規而褒之作樹風之秉彝務要其永遠傳尚今則世衰俗微未有如斯賞典故先賢之逸德幽蹟想或有與雲鳥浮沉此誠爲近世識者之所恨惟吾河東氏則往昔觀察使竹軒公泰鉉着眼于茲殫誠捐財裒聚先世諸賢之堂堂實蹟始克成編乃高宗乙巳之吾宗世蹟實錄也而其遺後昆之功以筆舌難以盡者也其後歲改月久將近二世時有今昔之異行有先後美蹟而今不續修則安知將不免雲鳥之歎哉以故己亥春宗會決定重續刊後勤幹宗人數三人閱歲專力今纔鉅梓告訖僉宗俾淳睦弁其重刊自顧知其不敢當而文與筆則睦固不及於人而熱與誠則睦可當出於人之右敢此數言寄於雲仍常日在茲各修其德謹承祖宗之心法以爲己之行則來頭之道德文章忠孝勳業儘可吾宗兼之睦固所願也僉宗豈不相勉勸者哉

檀紀四千二百九十四年辛丑流頭節密直公後孫淳睦謹序

河東鄭氏世蹟實錄舊序

道德文章忠孝勳業人之所難也故 國家褒之或享于院而 旌其閭載于竹帛而刻之金石務要其著遠而傳久盖重乎其蹟也凡天下冠儒服儒者莫不欽仰而尊慕之况乎其後昆爲哉噫我河南鄭氏道德文章忠孝勳業歷世輩作或院而享焉閭而 旌焉竹帛而載焉金石而刻焉又或行乎實記昭乎諸贊贊述載于譜牒編于邑誌則著 固 備矣傳固完矣然若非學識淵博者則有難盡舉而遍睹矣余今老大而所知惟蒙祖幾贊至於分派族祖略聞畧記而得其詳則渺然凡我族黨之散在八域者非我幾人乃議于族叔在薰氏哀聚諸贊之堂堂實蹟而合成一冊覽輒瞭然一着而可悉歷世盛德遂名曰世蹟實錄印得幾十帙分藏于各派族家使其幼昧雲仍備知某祖之爲道德文章某祖之爲忠孝勳業云爾

上之(高宗)四十二年乙巳仲秋文獻公十四世孫前行觀察使泰鉉謹序